

Illerfinnik angerlaassilluni assartuinnermut ikiorserneqarsinnaanermut piumasaqaatinik illuinnaasiunngitsunik aalajangersaalluni pisortanit ikiorsiissutit pillugit malittarisassat atuuttut allangortinneqarnissaannik siunnersuummik Naalakkersuisut kingusinnerpaamik UPA2020-mut saqqummiussaqaarnissaannik Inatsisartut aalajangiiffigissaattut siunnersuut.

(Inatsisartunut ilaasortaq, Aqqaluk Heilmann, Atassut)

Akissuteqaat

(Peqqissutsimut, Isumaginninnermut Inatsisinillu Atuutsitsinnermut Naalakkersuisoq)

Siullermeerneqarnera

Illerfinnik angerlaassilluni assartuinnermut ikiorserneqarsinnaanermut piumasaqaatinik illuinnaasiunngitsunik aalajangersaalluni pisortanit ikiorsiissutit pillugit malittarisassat atuuttut allangortinneqarnissaannik siunnersuummut Naalakkersuisut qujapput.

Pisortanit ikiorsiissutit pillugit Inatsisartut peqqussutaanni § 23, imm. 2-mi allassimavoq, toqusup pigisaasa imaluunniit qanigisaasut aningaasartuutit akilersinnaanngippatigit, kommunalbestyrelse illerfiup angallanneranut ikiorsiissuteqarsinnaasoq.

Illerfimmik angerlaassilluni assartuinnermut ikiorsiissuteqarnissamut aalajangiiniarnermi tullinnguuttut isumaliutigineqartariaqarput:

Toqusup illoqarfigisaanut nunaqarfigisaanulluunniit angerlarsimaffianut illerfiata assartornissaa qanoq akeqarpa, aamma toqusup pigisaasa nalingi aningaasartuutit taakkua matussusersinnaavaat. Toqusup pigisaasa naliisa aningaasartuutit matussusersinnaannut naammangippata ilaqutaasut aningaasartuutininik akiliinissamut periarfissaqarnersut kommunalbestyrelsip nalilersussavaa.

Inatsimmut nassuiaatini ilitsersuutinilu erseqqissarneqarpoq "ilaqutariit" tassaasut qaniginerpaasat, soorlu katissimasaq / aalajangersimasumik inooqatigisaq, meeqqat, qatanngutit angajoqqaallu.

Taamaattumik illerfiup angerlaallugu assartorneranut aningaasartuutit akilernissaannut toqusup pigisaasa nalingi ilaqutaasulluunniit aningaasaqarneri naammannersut pillugit nalilersuinnermi piumasaqaatit inuillu kikkut tunngavigineqartussaanerinit tunngatillugu kommunalbestyrelsip aalajangiisussaanninnera matumani pineqarpoq. Taamaattumik piumasaqaatinik illuinnaasiunngitsunik aalajangersaanissaq pisariaqarsorineqanngilaq.

Malittarisassat atuuttut malillugit, inuit illoqarfinni assigiinngitsuni najugallit assigiinnilli isertitatigit atugallit assigiinngitsunik aalajangiiffigineqartarsinnaapput. Taamaattoq angerlarsimaffiup qanoq ungasitsiginera apeqqutaalluni illerfinnik angerlaassilluni assartuinnermut aningaasartuutit allangorarsinnaaneri eqqarsaatigineqassapput, taamaattumik piumasaqaatit qulaani pineqartut malillugit nalilersuineq inunnut assigiinnik isertitalinnut assigiinngitsunik inerniliisoqarsinnaaneranik kinguneqarsinnaavoq. Illerfimmik angerlaassilluni assartuinnermut toqusup pigisaasa nalingi qaniginerpaasalluunniit aningaasartuutininik matussusiisinnaanerat aalajangiisuussapput.

Taaguutilli "ilaqutariit" qanoq paasineqarnissaanut nalornisoqarsinnaanera miserratigineqanngilaq, taamaattumik Naalakkersuisut siunnersuut manna tunuliaqutaralugu ilitersuummi piaartumik erseqqissarusuppaat, ilaqutariit tassaasut kingornussisussat. Taamaalilluni erseqqissumik allassimassaaq, assersuutigalugu qatanngutaata aningaasaqarnera eqqarsaatigineqassanngitsoq kingornussisussaataasumik katissimasamik aappaqarpat.

Pisortanit ikiorsiissutit pillugit Inatsisartut peqqussutaata tamarmiusup aaqqissuuteqqinneqarnissaa Naalakkersuisut misissuleruttorpaat, matumanilu illerfinnik angerlaassilluni assartuinnermut ikiorsiisarneq pillugu nassuiaammi erseqqissaanerusoqartariaqarnera ilanngullugu isumaliutigineqassaaq.

Naalakkersuisut taamatut oqaaseqarlutik siunnersuut itigartinneqassasoq inassutigaat.